

Antifone di jentrade cf. Sal 87,3

Che e rivi, Signôr, denant de tô muse la mê preiere;
slungje al gno lament la tô orele.

Colete

Diu onipotent e bon di cûr,
slontane di nô dut ce che nus fâs mâl
par che, pronts cul cuarp e cu l'anime,
o podìn servîti in plene libertât.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Sap 6,12-16

La sapience si lasse cjatâ di chei che le cirin.

Dal libri de Sapience

La sapience e je sflandorose e no pues smamîsi,
le cognossin a colp chei che i vuelin ben
e si lasse cjatâ di chei che le cirin.
Par fâsi ricognossi, e rive prin di chei che le bramin.
Chel che al jeve par jê denant di nol varà di fadiâ,
parcè che le cjararà sentade su la sô parte.
Pensâ a jê e je la colme dal sintiment,
e chel che al vegle par jê al finissarà in curt di strussiâsi;
parcè che jê e va a cirî chei che i son degns,
ur comparîs tes stradis cun biel trat
e ur va incuintri in mil manieris.
Peraule di Diu.

SALM RESPONSORIÂL dal Salm 62

R. E à sêt di te, Signôr, la mê anime.
Diu, Diu gno, sul crichedî o soi pront a cirîti;
e à arsetât di te la mê anime;
viers di te la mê cjar e brame
come une tiere sute, arsinide, cence aghe. **R.**

Cussî mi soi metût a cjalâti tal to santuari
par viodi la tô potence e la tô glorie.
Parcè che la tô gracie e vâl plui che no la vite,
a cjantaran i miei lavris lis tôs laudis. **R.**

Cussî ti benedissarai par dute la vite,
lis mans viers dal to non o slungjarai.
La mê vite si passarà come te miôr taulade,
biel che la mê bocje ti laudarà cjantant di ligrie. **R.**

Cuant che o soi sul gno stramaç, ti pensi,
cuant che o vegli gnot vie di te mi visi.
Tu sês stât tu il gno jutori,
jo mi jempli di gjonde sot des tôs alis. **R.**

SECONDE LETURE 1 Ts 4,13-18

Diu al tirarà dongje di sè chei che si son indurmidîts midiant di Jesù.

De prime letare di san Pauli apuestul ai Tessalonicês

Fradis, no volin lassâus ta l'ignorance rivuart a chei che a duarmin, par che no vedis di avilîsi come chei altris che no àn sperance. Di fat se o crodìn che Jesù al è muart e al è risussitât, cussì o vin ancje di crodi che Diu al tirarà dongje di se chei che si son indurmidîts midiant di Jesù. Chest us al disìn su la peraule dal Signôr: che nô, che o sin in vite e o sarìn restâts ancjemò culi, cuant che al tornarà il Signôr no rivarìn prime di chei che si son indurmidîts. Parcè che il Signôr in persone, al comant, a la vôs dal arcagnul, al sun de trombe di Diu al vignarà jù dal cîl e i muarts in Crist a risussitaran par prins. E daûr ancje nô, che o sin in vite, che o sarìn restâts ancjemò culi, o sarìn puartâts sù cun lôr parsore dai nûi par lâ incuintri al Signôr. E cussì o sarìn simpri cul Signôr. Confuartaitsi alore un cul altri cun chestis peraulis.

Peraule di Diu.

CJANT AL VANZELI cf. Ap 2,10

R. Aleluia, aleluia.

Ten dûr fin a la muart, al dîs il Signôr,
e ti darai la zoe de vite.

R. Aleluia.

VANZELI Mt 25,1-13

Ve il nuviç, lait incuintri!

Dal vanzeli seont Matieu

In chê volte, Jesù al disè cheste parabule ai siei dissepui: «Il ream dai cîi al sarà compagn di dîs fantatis che a cjaparin sù i lôr ferâi e a saltarin fûr incuintri al nuviç. Cinc di lôr a jerin cence sintiment e cinc prudentis. Di fat chês cence sintiment, cuant che a cjaparin sù i lôr ferâi, no si impensarin di puartâsi daûr ancje il vueli; lis prudentis invece, insiemi cui ferâi, a cjaparin sù ancje il vueli tes vasulis. Stant che il nuviç nol rivave mai, si lassarin cjapâ dutis de sium e si indurmidirin. Ma a miezegnot si sintì un berli: Ve il nuviç, lait incuintri! Alore dutis chês fantatis si svearin e a sistemarin i lôr ferâi. Chês cence sintiment ur diserin a lis prudentis: Daitnus un sclip dal vuestri vueli, che i nestrin ferâi si distudin. Lis prudentis ur rispunderin: No, lafè! Che no vedin di restâ cence nô e vualtris. Lait pluitost a comprâlu di chei che lu vendin. Biel che chês a levin a comprâ il vueli, al rivà il nuviç e lis fantatis che a jerin prontis a jentrarin cun lui te sale de gnoce e la parte si sierà. Plui in ca a rivarin ancje chês altris fantatis e a diserin: Signôr, Signôr, vierzinus! Ma lui ur rispundè: Us al dîs in veretât: no us cognòs! Veglait duncje, parcè che no savês ni la zornade ni l'ore».

Peraule dal Signôr.

Su lis ufiertis

Cjale di bon voli, Signôr, lis ufiertis che ti presentìn
par che, cuntune sante dispozizion,
o podìn vê ce che o celebrìn tal misteri de passion di to Fi.
Par Crist nestri Signôr.

Antifone a la comunion Sal 22,1-2

Il Signôr al è il gno pastôr: no mi mancjarà nuie.
Mi fâs polsâ là che i passons a sverdein,
mi mene là che a son aghis frescjis.

O ben: cf. Lc 24,35

I dissepui a ricognosserin Jesù, il Signôr, tal crevâ il pan.

Daspò de comunion

Ti ringraciìn, Signôr,
di vènus sostentâts cul to sant regâl
e o preìn il to boncûr
che il to Spirt al conservi in gracie e scletece
chei che a àn ricevude la fuarce dal cîl.
Par Crist nestri Signôr.